

樊山全集

上海廣益書局印行

批判

樊山批判卷十一

批

恩施樊增祥嘉父

批薛元珍稟詞

此次兵左用車每里只派一輛行坐價由局發給里下縱有幫貼何至一輛車貼錢二百串萬一每里徵車十輛豈不須貼二千串乎稟詞殊屬荒唐仰原差看為了結勿得藉差漁利

批賀天祿稟詞

現在倉糧由學廳督催候驗明該倉如是係破漏荒豆寔係損壞李紀綱等玩視之咎決不能辭惟本縣定章先修倉而後收糧糧係新收則倉應早補何以甫收入倉即已損壞誠恐入倉之始即係霉爛之豆亦未可知統俟查明嚴究

批原差于明呈詞

向有之牆因雨傾倒為何不許另築者照向來界址修築員義元不得刁阻員天祥亦不准過界

批秦成林呈詞

張成兒現在歸宗縱非爾子亦是爾外甥果然目無尊長爾妹豈能庇護爾身為母舅打也打得罵也罵得何必屢次送官徒然貽累試問差票一出爾能不花一錢乎本縣好言開導爾自惡之傷單增卷仍仰差約查奪

批權秉義稟詞

所稟甚妄本年倉正即着雷振遠接辦以後輪流充當均勿違抗本年修倉不敷錢文者在局具領仍將用過錢數開具清單呈案備核

批柳蔭陶呈詞

據稟已悉孝義城工局帳本不可必清算何也從前儘收儘用收多少即用多少此時若責其用帳不寔亦屬無從追究只有寬其既往慎其將來惟趙紳於光緒十九年二次進局忽將其私債二千兩撥歸城局認還寔屬異常荒謬此後趙某不得再與局事德日新之帳亦不得向局索還即以此批斷結此案可也至團防一事另諭飭遵趙紳呈案之帳著存房

批值年李彥平稟詞

車價雖無一定然亦不能過於居奇何至每日需錢三串五百之多而局發之行生各價亦歸車夫承受事太無理誰肯攤錢至客民領種叛產已經升科納糧者自應幫差仰該管糧差查處覆奪

批楊正祥呈詞

報呈荒唐已極楊居寬與爾妻有何深仇何至兩次糾人毒打爾妻既被毆傷自應控官請驗何得竟將受傷之妻抬至楊家過夜又不留人看守致被推入井內是爾妻之死寔由爾藉傷訛詐所致現據楊居寬以受唆移賴等情控爾到案候詣驗明確若無毆打傷痕定治爾誣告之罪

批房書楊先甲呈詞

久則生玩人情類然本縣初到任時房差各懷敬畏今見本縣相待和平遂爾疲玩嘗試殊不知官與房差朝夕相見斷無日日生氣之理公事下得去自然待得好若怠玩誤公有心朦混本縣執法嚴明豈能輕恕廉恥須要自愛髮膚須要自惜職分須要自盡飯碗切勿自砸前日軍糧比較短至千數百石之多而兵書袁學慎將比期挪移一月爾等抬頭試看本縣豈可欺者耶而末打已屬格外從輕欠糧升合未補而又遽請開枷爾等自問公事上下得去否看覆候奪

批王順官呈詞

此呈係何人寫作何以無代書戳記爾妹被其夫兄毆逼投井何人看見爾與爾母爾舅聞報往看任喜兒等持械趕逐爾與爾舅逃跑何以棄爾母於不顧致被毆傷究竟爾母現在何處查爾妹十三日投井今已五日之久是否已經棺殮抑尚停尸待驗均未聲明如果屍未入棺時當三伏尸停五日任氏兄弟及該村鄉約豈有不報請詣驗之理如已入殮棺豈可以輕開現在藉屍詭詐之案不一而足仰役迅喚任喜兒及年有村鄉約來案具稟原報王順官隨堂候訊

批馬計有呈詞

爾始稱馬生春為堂叔繼又云兄故乏嗣語不可解究竟馬張氏是爾堂孀乎抑爾堂嫂乎安與膽敢如此混帳著傳案嚴懲

批昔貴呈詞

差隨糧行既已種地納糧豈有不幫差之理著諭令從公幫派毋得固執

批楊齊氏呈詞

據稱爾子楊長命於五月十四被人打死棄屍死水潭中又云將屍黑夜私埋忽棄忽埋已屬支離無理而以殺子之仇遲至七十餘日始行呈控尤屬情理所無著差約及該村官人迅速查覆候奪

批韓崇海呈詞

准喚究查前次過兵每里派車一輛何以爾里支車六輛語不可解著票差先查後喚

批孫學書呈詞

添修堡寨置備器械乃最要之事亦必辦之事何人擅敢阻撓爾稱村富阻撓而不指出名姓是屬顛

項已極候出示催辦有抗阻者指名稟案究懲

批石仁財稟詞

以九幫一一定之規但爾值年人等僱車應差亦不得任聽車夫婪索總之局發行坐各價並不虧人里下量為津貼則可過多則為浪費如車夫居奇挾制准值年指名稟究其津貼之費仰原差諭令九甲公幫可也

批李如琦呈詞

九甲幫一各里皆然豈能獨令爾一甲受累著原差好為諭飭勿使苦樂不均此飭

批蔡鳳魁呈詞

爾兄物故遺有一妻一妾爾欲搬回同度而程命子輒將爾无妻蘇氏匿藏即使爾兄真欠命子錢文亦不能將人作抵其中定有別情爾商州人專以賣寡婦為事爾之往搬孀嫂果是好意乎抑欲賣錢肥己乎著差約查明覆奪

批馬坊彪呈詞

堡寨修完按粮派費各鎮皆然惟寨中既有殷富之家自宜城勸加捐以減貧民之累者即好為勸導集資辦理仍將修城置械用過銀錢數目報縣存查以免物議此飭

批糧差王林稟詞

閔村之糧撥給田市田市添三畝之糧閔村即應減三畝之糧何以云閔村遺有空粮若兩里齊收豈非一糧兩納乎究竟王立讓因何將糧提歸別里均未聲明著明白稟覆核奪

批左逢原呈詞

據稟已悉所呈或豆霉爛不堪田藍玉等經理倉粮聽其霉變至此而去春各倉出放之時並不遵半借半賑之例即行散放今值督收新粮之際竟欲將此項壞粮强交新倉正副之手實屬糊塗荒謬已極尤可異者李懷泌平素尚能辦事而亦扶同田藍玉等將壞粮說成好粮欺哄本縣試問本縣豈可欺者耶著即日喚案聽究

批王福祥呈詞

爾以九十五串錢賒孫繼德煙地九畝五分是一畝費錢十串及收割二畝有零僅得烟一百兩零遂被冷雨將七畝有零之煙一齊打壞設席邀請地主懇其讓價等語爾未動刀之先曾否付給錢文設席之後伊允讓若干串概不聲叙况爾既來賒煙自應攜帶銀兩何得一錢不名貿然賒割迨承情讓價之後反要回籍賣地償還此等瞞天大謊誰人肯信爾回籍時將煙土質押孫家豈不慮其抵換乃竟貿然寄頓至生今日之波是爾寄土質押之時已預為今日訛賴之地爾割煙在五月廿日中隔閏六兩月至七月初二日始以持杓欺異其控况爾此次僅交錢三十串了事則當承讓之時爾有煙土二百餘兩何止賣錢六七十串爾何不就近賣土歸還而乃回家賣地乎况爾未賒孫家煙土之先已攜有煙土一百餘兩彼時各處煙地俱未開刀此土從何而來似此荒誕呈詞膽敢來本縣案前嘗試計圖誣累訛賴寔屬混帳已極不准

批何樹德呈詞

投井是何等事而可聽人唆使乎何維平因爾不揭煙土遂唆母投爾井內其母亦遂遵命投井情節荒唐已極事在七月初四何以遲至初九始行報案究竟其屍是否棺殮何維平母死不控而又不即時報驗均屬荒謬萬分著差約會同查明據寔稟案以憑嚴究

批常生馥稟詞

該職獨力捐修堡寨甚屬可嘉至堡中尚有有力之家自應酌貲置備軍械其甯姓墳塋離所築城垣遠在四十步之外有何妨碍准如所稟分別出示給諭以速其成

批寨長張維三稟詞

刻下民情困苦已極舊有城堡之處量為補修原可若工程浩大民力有所不逮必須將貲費通盤籌畫富民出錢貧民出力有所不足酌量公派該生等妥慎辦理可也

批倉紳郝子龍稟詞

據稟已悉糧為民食食乃民天此次決計收倉斷無中阻着即迅速開倉里下交糧隨到隨驗隨隨收勿稍推緩至前次所云撥歸下邳之糧該倉勢不能容仍應交於故市著即一併收儲並合計一共應收糧若干石現修之倉可儲糧若干石萬一倉少糧多則一面收倉一面將馬神廟之廩補修完固以免露積如兩廩業已足用則馬神廟廩不修亦可此諭

批趙席珍呈詞

此等官司何必再打爾之錯處在於將已身私債撥歸城工局代還如果德日新之銀是同治年間城工局所借何以二十年來城工局並不償還而德日新鋪事敗壞之後既有此帳又何以甘心不討直至待爾自甯波被參回籍二次入局始將城工局餘款填還此項其為混私為公顯然可見本應將所用餘款三百八十餘兩照數追賠姑念爾從前捐過多金此次從寬免究但自今以往德日新之債歸爾自了城工局不得代償本縣批結此案可謂嚴中寓寬而爾尚不知道退屢以不通之稟遣抱瀆陳意欲與楊士坊決一死戰其愚真不可及至於流芳貽臭仍視爾自立何如豈楊士坊等所能播弄爾

趙家從前捐貲近萬今失於二十年後將二千金之債撥局代還何其慷慨於前而詭混於後又何以慨施萬兩而詭混兩千總之爾本一糊塗無用之人雷波之事本縣知之稔矣無此詭混一節未必流芳多此詭混一層亦未必加臭若聽本縣相勸從此力行善事莫打官司積德累仁鄉里自然欽敬若必欲公庭涉訟則楊士坊早已訐爾從前中舉係花錢買來本縣欲為爾雪此大恥擬堂堂面試三文一詩如果清通然後集案審訊爾敢來否

批馬兆云呈詞

前已明白駁斥茲復以原詞瀆控夫借爾錢者王正道也事在光緒二年爾整整二十年不向索討直待正道已故乃控其弟正名抗帳不還又稱正道借錢係為正名定婚此明明裁帳於正名身上以冀償還爾渭南女人頗貴十二吊錢何能辦娶妻室察其情節縱非以假為真亦係捉生替死仍不准

批李順福稟詞

稟詞不甚可解崇玉來牽牛過渡船到河心將崇玉來滴於河內滴字不知何解人甫落水自應即速撈救何以云入水找尋不見形迹情詞殊屬荒唐現在牛在何處玉來家屬曾否告知均未申叙候傳訊

批王李氏呈詞

准喚案嚴究查爾婿曹杏娃乃曹殿俊之子殿俊素非善類此呈必係伊父子所為詞稱爾婿幾乎受傷可笑之至本縣堂前不能撒謊爾知之手

批奧萬鑑呈詞

爾於光緒十六年憑郭奉成等為媒娶蔣張氏為妻即在蔣家居住豈非坐堂招夫耶今夫妻不和忽

稱媒人唆鬧來案具控試問兩口子吵架打甚官司倘再胡纏定將爾解回原籍不貸所控不准

批張文貴呈詞

爾可謂混帳已極無緣無故圖翻已結之案妄捏銀條多指干証及押候添傳覆鞠情見勢屈乃懇恩求釋似此反覆刁詐豈可姑容着自向李生智懇情伊如具保再行酌奪釋放

批呂恒升呈詞

爾胞妹新呂氏首送其子福兒爾為外甥乞恩可也婉勸爾妹息事亦可也乃稱爾妹受爾義子田庚兒即呂庚兒刁唆併稱庚兒與爾妹苟且查新呂氏以親母控其親子爾即以胞兄揭胞妹之醜以義父發義兒之奸均屬人倫奇變廉恥傷亡案已飭傳著候質訊勿瀆

批王寶兒呈詞

異姓亂宗照例不准爾以商州客民與渭南權萬鎰承嗣本屬有干例禁承繼五日被逐離門正是權萬鎰夫婦好處而爾乃控請拘究試問昨日為爹娘今日成被告爾之糊塗混帳亦概可知矣此案無庸傳訊仰役將王寶兒帶案遞回商州完事

批生員劉瀚章呈詞

瘋秀才又來矣疑義不能析爾之恨也奇文共欣賞我之幸也語云心病須將心藥醫本縣不會醫病纏我何為

批賀金錫呈詞

爾所賣之地與所當之地緊緊相連必無肥磽之異何以賣價每畝三百文當價每畝一串六百文楊金娃買爾已業十九畝只需錢五串七百當爾沽業五畝反要錢八串無怪其肯買而不肯當也爾因

伊不肯以原價當地即來控告殊屬迷謬已極不准

批劉萬智呈詞

姑准銷案結擲還天下豈有父子講和互具遵依之理爾等糊塗該死

批王炳炎呈詞

據稟具見慷慨樂施助興文教准如所稟將續捐民糧地三百畝合之前捐義田共為六百畝一併歸撥景賢書院招佃取租以資膏獎仰即與書院齋長及下邳鄉約指明界畔收入院中併飭里書將每年應納地糧改歸景賢書院完納該齋長等將地收清即將該田坐落何處四至毗連何人每年租錢若干某人佃種若干畝一併開具清單呈核以便永遠存案可也

批王李氏呈詞

爾身為原告何言王恩彥累爾涉訟公庭爾初呈稱王恩會等刀砍爾婿曹振瀚幾乎帶傷是曹振瀚乃案中要証何得屢次請免王田氏訴呈內稱曹殿俊父子謀業逼嫁而王振海又指控殿俊勢欺懦親批准併案質究是殿俊乃係首被何能由爾請免試問本縣若將王振海王恩彥一齊免喚爾肯答應乎本縣問案慣能洞見小人肺肝爾一婦人何能屢次呈控誰為謀主早已洞明此案着原差迅速送審併令職員曹殿俊攜帶執照當堂呈閱如曹殿俊父子延避不到定將原差兩腿打斷

批李彥稟詞

據稱會同王平西五門宗族查得該武生有地九十七畝八分每年僅完糧二石九斗九升零糧不敷地等語究竟短糧若干該地是何等則糧係何年短起所短何人賠墊着會同里書根差確切查明稟覆以憑訊斷粘單存

批高義德稟詞

據稱牛軍勇丁在臨潼將爾稍馬截斃事在八月三日爾何不登時在臨喊控乃該軍已去三日始請本縣作主是屬昏憤已極既稱稍馬已無著將車拉回可也

批王世孝呈詞

據稱爾故父四十無子爾以堂姪承嗣居長又繼王福來為次子後來爾嗣母連舉兩子三曰新娃四即被告世杰爾父既有親子遂將爾與福來分居另度是爾父在生已將爾分析出外矣爾父今秋身故自應親子世杰頂理爾何得強爭家業早奉父命分析爾何得重分所控糊塗已極不准

批張桂林呈詞

爾於七月二十三日控稱本年四月族人張德齡等誣良為盜將爾吊拷一日爾不立時控請驗究反躲避在外不敢歸家已覺支離不是嗣因德齡等逼令爾母逐爾歸宗不遂竟將爾七旬邁母毆受重傷批飭驗傷渺無傷單呈閱其誣可知乃於十餘日後突稱爾母因傷身死而又不請相驗並稱爾未在家係爾姑母所言姑母為誰豈無姓氏因傷身死傷在何處初三母死初七始控是屬荒唐已極此案前飭差約查復著即日詳細稟復候奪如延重責不貸

批王田氏呈詞

爾與李氏一妻一妾對打官詞均有從中主唆之人爾言李氏呈詞皆曹殷俊所為誠然不錯爾此呈蓋用件作戳記明係來呈代截然則爾呈獨非他人代作乎一班壞種唆使兩孀破家構訟若入地獄罪應敲牙拔舌此案著原差即日送審如延重比

批魏興成呈詞

父首其子兄控其弟控弟寔控父也父不父子不子兄不兄弟不弟爾魏氏家欺人亡可立而待候添傳分別責究

批魏王氏呈詞

據控王天作種種欺心爾何以早不控究案未控官輒糾人前往抱帳停門致天作控報搶案爾等亦屬糊塗候傳訊嚴究

批王天作呈詞

現據魏王氏魏朝儀以惡夥滅東等情控爾在案而爾輒因東家抱帳停門控報搶案將張遇芳等三人指交路役拴鎖世間豈有黑夜糾搶白晝來縣自投羅網者乎候訊明嚴懲

批于興會詞

東夥紛爭妄報搶案寔堪痛恨現據兩造互控前來候即日嚴訊澈究指獲之張春官等三人不必拴鎖

批夏朱氏呈詞

爾有夫有子俱不出頭而爾以婦女瀆控誣賴無疑爾稱爾女與權中全作妾遭伊妻權蘭氏打死事在七月廿八何以遲至八月初十殮埋旬餘之後始控不准

批王天作呈詞

爾捏報搶案茲又推於姜姓身上狡惡已極候質責

批王汪氏呈詞

卷查老陳王氏坐堂招夫與家奴李世祿苟合爾女小陳王氏吞煙併命誓不以世祿為翁迨經堂訊

斷令老陳王氏隨李世祿過度水離陳門所有財產歸爾女小陳王氏承受立嗣守節何等光明正大乃事隔兩年爾忽欲為爾女招夫膽敢呈請本縣作主若老陳王氏反唇相問何詞自解爾等混帳糊塗是堪痛恨不准

批呂春茂呈詞

爾乃田庚庚也既已歸宗何得尚稱呂春茂查呂恒升撫爾為子爾並不以為父盤踞姑母新呂氏家中與之姦好唆令新呂氏將子息孫女一併趕逐在外爾復代作抱告呈首新福兒忤逆不孝意欲置之死地爾之罪惡十死不足蔽辜茲乃懇祈保外携妻歸宗查呂恒升為爾娶妻花錢一百餘串爾承嗣多年無一日之養今及白得一妻逍遙復姓天下便且讓爾惡人占盡天理何在人心何安者將呂恒升所費之錢從寬減為一百串交案飭領然後准爾取保領妻

批洪善娃呈詞

李德兒原控支離業經差查稟銷茲據控稱德兒於七月初八日在爾妻坑上睡卧經爾撞獲給爾煙土一碗了事今竟將爾妻拐逃無踪爾既知其有姦猶不嚴加防範圖賄縱淫無恥已極候一併拿案究懲

批徐相寅呈詞

爾醫好劉王氏之病得錢一串亦不為少何至興訟爾以七十六歲之老人劉孩兒何至肆行毒毆所控顯係訛賴候驗傷察奪無傷不准傷輕亦不准

批校維夏呈詞

該鄉正品學兼優本縣素深敬佩茲當舉辦團練之際三鄉之事深賴匡扶據稟心疾未痊恐誤公事

等語本縣以為此可以靜養而不必辭退也現在公事喫緊准該鄉正自擇一人暫行代辦以便安心調攝病痊之日仍助本縣辦公兩不相妨是為善策仰即知照南七里里正既經該鄉正開列呈案自係可靠之人應即給諭飭令遵照章程迅速舉辦並仰各鄉正速舉里正以便諭充可也

批王仲英稟詞

所稟乃小事耳同學讀書以和為貴爾等齊舍破漏如果齋長不肯修理儘可隨時告訴院長為爾等作主否則於官課時告我必當立飭修葺田紀鳳在書院廩考第一茲被稟訐其知者謂爾等因公不知者謂爾等忌才甚不可也仰禮房陳儼迅往五鳳書院勘明如有齋舍穿漏者立即補葺完好俾諸生安靜用功此飭

批田滋榮呈詞

現據王仲英等懇換齋長而爾等又懇留齋長兩稟之中均有劉秉離劉家俊曹秉離之名殊不可解此三人者究竟願留抑願換即齋長田紀鳳文字清華本係院中翹楚惟既被稟訐候請儒學查明再行定局著長班持我名帖將兩稟送與儒學閱看

批李英呈詞

丈量之案多矣從未聞有古尺大而今尺小之說明係許成林胡攪者會同里書核明地根確數諭令照數完納如違帶究

批田紀鳳稟詞

該齋長品學素為本縣器重異已排擊事所時有不必固辭

批李宗桂呈詞

王仲英佔踞書院而本縣官課從未應考其不通可知自己不通而反忌人之才竊名妄稟此尚得覲然人面列於士林乎王仲英著逐出書院永遠不准考課至李蔚坤書法尚好兩年以來詩文亦有進境本縣期其發達乃竟與王仲英朋比誣訐寔屬不知自愛李蔚坤姑從寬申斥倘再不悛鳴鼓攻之可也

批羅榮福呈詞

爾明明訛詐何待差查茲不但訛親家而且訛差役仰爾赴省上控本縣不管

批常生馥呈詞

築寨誠為要政遷墳須順人情候飭役協約查勘明白與雷姓妥商辦理至左會王家本殷是僅僅派銀十兩而抗不持出致滋閭里觀望殊屬非是仰役催令措繳勿再吝延干咎

批吏房經承陳煥新呈詞

徐應堂之罪較輕於張翟二人茲伊懇恩入卯本縣因散書在經承手下辦公須聽爾調度方能合手若意見不合則反滋事端是以令爾稟復爾如能制此人即令入房幫辦如不願不妨明言本縣不勉強也

批趙席珍呈詞

城工局借款不入城工局帳二十年來城工局不還德日新不討直至爾二次進局始以餘款填還此項此事之最無理者也前後接替必有交代爾從前赴蜀之時何以不交給王明萬一爾宦蜀不歸德日新之款向誰索償乎爾即非說混亦屬異常疏忽既經疏忽二十餘年之久此款自應爾自己償還彼城工局以二十餘年從未過問之債一旦哭令以餘款付人誰肯答應爾既稱借還帳據針縫相合

然則爾從前赴蜀時何以不交代此次構訟爾前後三次具稟何以並不提及天下無理之事斷不能強為有理據本縣看來爾亦可以已矣楊士坊本屬健訟爾如有理與之結訟可也爾自己立脚不住而與訟棍打此無味官司不亦勞乎仰仍遵前批行

批趙席珍呈詞

爾因說混字樣不甚好看是以屢次瀆稟今為爾銷去說混二字何如

批權林冥稟詞

所處甚為公允可嘉之至里正得人則一鄉受福本縣亦可省心准如所處急銷可也結存

批冠悅發呈詞

爾既在臨潼呈控何又歧控渭南詞稱魁順行奪爾車騾查爾該欠公順行銀兩未清輒借張同兒一案任意抵塞寔屬狡詐已極仰原差陳升協同張廷倫勒令冠悅發將公順行銀兩交清該行即將車騾退還了事至臨潼之案本縣不管

批呂王氏呈詞

死者非爾子也王祥瑞招贅屬寔嗣因翁婿不睦携妻另度適與爾同院居住並不同炊爾既非王祥瑞親生之母而且另嫁多年何得冒充母親冀得卹賞之銀又覬賣孀之利寔屬貪昏無恥著敘回村勿得妄瀆干咎詞不列抱顯係恃婦攪局不准併飭

批杜白氏呈詞

爾從前母子構訟經本縣斷結茲又為武天才所騙復行呈瀆爾以孀婦恃本廠為生何得輕信天才之言無中無據遽令將木料出售所呈如虛固屬恃婦誣賴所呈即寔尤屬昏謬糊塗候差查覆奪

批何忠琦呈詞

前已批飭何致元來案聽候面訊茲據爾等懇息前來查何甲寅之父何如彥於十八年被何盛兒毆斃訊辦擬抵而盛兒旋即遇赦釋出以後甲寅為父報讎盛兒隕命冤冤相報曷有已時若照例擬辦是盛兒一命換何如彥父子兩命也盛兒之父何致元依處懇息具見老成懂事為防後患起見姑如所懇暫緩詳辦何甲寅現尚在押即著爾等協同何致元來案保領如不要連了結本縣初稟已具不能久待也此飭結俟當堂另具

批劉賓禮呈詞

爾憑媒娶寡婦朱郭氏為妻其弟郭益新主婚人未過門何得將財禮錢八十串一齊付給交錢以後該氏繼父劉作新竟將該氏另賣致爾人財兩空爾之禮錢究係何人所得不難憑媒索討而劉煥章事外無干何至將爾辱罵所呈種種不情姑候差查覆奪

批李時英呈詞

該里正老成練達本縣深相倚任茲據懇稱義糧還倉各戶積疲非差催不能輸納候即日出票催收至稱年力已衰另舉兩賢自代准如所懇諭飭武訓貢充膺里正以專責成單存卷

批張萬智呈詞

爾昨日遞一呈今日又遞一呈寫呈不要錢乎這是何苦

批王相林呈詞

前已札飭捕衙按照倪任給發麵斤嗣據來單稟覆悉仿倪任辦理乃接稟未幾常潯深即已潛逃如果照給口糧何至於此近奉部文違犯逃亡各該管官處分加重尤宜悉心安插勿任丁役凌逼滋事